

施愚山全集

第一函
五十五册

施愚山先生學餘文集卷之十九

墓誌銘

故翰林修撰蔣君墓誌銘

蔣君虎臣先生諱超字虎臣江南金壇人年二十二舉于鄉又二年舉丁亥進士
一甲第三人官翰林修撰以文雄于時主浙江省試提督順天學政並清慎事竣
告歸不過里門見妻子扁舟草屨徑自楚之蜀客死於峨嵋之伏虎寺朝士大夫
之賢者歎異流涕蜀之大吏經紀具舟歸其喪某年月日將卜葬于某山之原於
乎初君之訃至余為文哭之許志其墓以君故善余言也君早入翰林攻詩文酷
嗜書法人屏壁間一字可喜必鉤勒藏之心慕手追于晉唐行楷得其筆意為人
和易獨刻苦痛自下多布衣野老方外之交見之則罄折傾倒狎游不厭橐空亡
一錢人告之急怛若負重劓門生故入有所餽送則以遺貧交比丘應手立盡視
其齋厨嘗糞鹽不給無悔也君既厚與人人益歛望小不遂則訶責交至惟曲應之
恐後時時以德報怨人或重背德誦言必絕之及其人至則握手歡如初在朝數
請假歸省其父僉事公祖母某太宜人留子舍不出既連即世破產治喪葬且哭

艾燭體以志哀痛見者愍之其督學畿內也時學租并入正賦視學使者無所資予君舉債賑貧士又疏請復古學禁天下有司刑責諸生每草疏時先焚香籲天積誠以格宸聽疏皆報可秩滿輒謝病歸休過嵩洛與孫徵君奇逢語數日以書來告謂不可失此人辛亥春君次長干僧舍予適在江寧要予出見大事相切劘委重丁寧若相訣別自此而躡匡廬遊鹿門兩年之間直達峨嵋矣君始生之夕祖母夢為峨嵋老僧見君生則解顏豐子饌客而自饌斷葷血二十年至是愛峨嵋山伏虎寺會當事請修四川通志峨嵋縣志不得辭數月書成即山中建一亭書蘿峰二字語小僮曰死厝我于癸丑正月遺書別當事越三日沐浴端坐留詩而逝翌日蜀人胡生嘗從君遊者見諸山椒頻呼蔣先生不應既入寺然後知君死皆大驚歎以為非常人也君生明天啓甲子先是有術者言其壽止四十九君篤信之為詩四十九篇至是歲果符合云君家世業農大父芝田公有隱德生子諱鳴玉舉進士為聞人累官山東僉事母某太宜人生二子君為長其季曰進金壇縣學生君之子顯祖并力學有材行女適宦族君平生遊歷五岳及黃山九華天台武當窮幽極邃不避蛇虎嘗語我曰僕有不可解者三畧貴顯而禮宴賤畏

館閣而僻山水薄妻子而篤比丘三者是也所著有綏菴詩文集若干卷論史百篇將說等書惟儒宗辯統輯稿未竟嘗戒忿怒自號無嗔道人又以家近華陽洞未歿前數日自叙有華陽山人傳云銘曰

華陽山人邪無嗔道人邪峨嵋比丘邪其儒而禪者邪於乎論其行誼非曾閔之徒邪

翰林院侍講學士曹公顧菴墓誌銘

曹氏自華亭徙嘉善世顯儒術六傳至豹明知某縣八傳銑兵部郎中並起家明進士有聲弘治隆慶間至君考諱勲崇禎戊辰舉會試第一官禮部右侍郎兼翰林院侍讀學士世所謂峨雪先生者也有子五人君為長復官本朝翰林院侍講學士父子以文名天下士論榮之君諱爾堪字子顧別號顧菴十歲能屬文十二善詩詞時人擬之聖童順治丙戌舉浙江鄉試壬辰登第改翰林院庶吉士授編修為文敏給博麗兼長眾體閣試兩稱最同館皆遜服之乙未春分校禮閣得士二十二人如陳尚書鼐永胡學士簡敬皆有聞當世是時

世祖章皇帝力崇文治數詔試諸詞臣品目甲乙君扈從瀛臺南苑上霽顏顧

問嘗受詔與吳學士偉業等同注唐詩書成稱旨時被褒嘉中外驚傳其語無何
以侍郎公憂歸服除補舊秩俄遷侍讀陞侍講學士故事翰林官皆積歲待遷君
半歲遷至再殆殊遇也

章皇帝升遐

今上登極遇 國恩追贈其兩世君益勤厥職坐族子通賊累奪級南歸適僮奴
與縣卒角誤觸尉怒尉膚慙長吏語過激事聞坐謫當徙關外先是君不交公府
當事更多不悅又自恃無罪不詣吏求解故卒坐法實非其罪也一時朝士親交
惜君者爭助私錢用營建例得贖無出塞自是釋冠芒履北抵秦晉南涉荆楚中
歷嵩洛海岱之間銘記詞賦動盈卷帙辛亥春嘗一過京師諸公卿欲為白復其
官齟齬不果行君亦掉頭興盡曰六十老人豈復夢金馬門哉然酒酣雄辯四座
盡傾縱筆為詩歌益復顛倒嘯呼累日夜不倦君淹博多識掌故又強記所過山
川阨塞無不指畫形勢士大夫一與之游積久不忘無貴賤具能識其姓氏爵里
家世無毫髮誤即虞世南之稱行秘書李守素之號人物志亡以過之今國家方
開史局使出其記問資纂修豈不一代盛事而惜乎其不獲遇也生右文之代膺

天子特達之知而細故蹉跌卒弃置以死豈非命哉君居親喪瘠毀推所有讓諸弟所留舊物惟一几一榻仲氏爾坊賢而早世手鞠其數歲孤鑑倫成進士今官庶常父事之惟謹計至余往弔其卹相抱而哭蓋余亦少孤倚先叔父成立故相視尤哀逾年得葬日二子鑑平鑑章書來屬庶常君請銘且謂先學士數稱公文章意蓋有屬於乎余何足以當君萬一哉初君客都下余以事適至與沈宋王陳諸公為文字交甚懽君會必有詩詩必數首新城王侍讀士禎于時薈最為八家詩刻之吳中它所著有南溪文畧二十卷詞畧二卷行世其編輯未竟者尚數十卷藏于家君生明萬厯四十五年丁巳七月二日元配恭人吳惠而孝儉而知禮族黨稱為女宗先十年卒君義不更娶今合葬于某山之原長子鑑平康熙壬子順天鄉試舉人候補內閣中書舍人鑑章杭州府學生入國子監今改知縣候選女四人一適己丑進士河南汝南道副使孫君潔初子候選知縣復煒一適前丁丑進士吏部文選司郎中錢君仲殷子文學煒一適己丑進士通政司左參議柯君岸初子候補中書舍人崇稷一許字太學生錢君德興子焯孫男五人孫女十一人嫁娶不勝書君享年六十三以康熙十八年己未十一月二十七日卒銘

曰

爛朝霞其東出兮驅使文字肆陽春之惠風兮鼓吹氣類既乘雲而上征兮曰掌
帝制羌頓轡于林臯兮雖躑躅兮不憔悴賦遠遊於九州兮曾不可乎一世拾騷
歌以為銘兮蓋悲其中路而失志

江西按察使司按察使東園李公墓志銘

李君東園先生按察江西既七年以康熙庚申正月二十日卒於官江西士民有
聞而巷哭者馳計至京師士大夫齋咨悼歎其同門年友施閏章痛甚走覓家君
御史錦相抱哭失聲蓋不惟故舊之悲而重惜善人殄瘁無以活我民也於乎刑
獄者國之大法民命所由死生也法司以刻為能以賄為出入每懲失出獲罪傳
會文致殺人如刈草不遑恤吾于東園之按察江西得其可書者數事滇閩之告
變也江楚間叛將內煽鄰寇外連郡縣吏陷賊或脫身竄山谷間賊所掠民子女
兵至復執以為賊富家巨族轉相連繫論死者無算君上承

聖天子德意視力所得為者請于督撫兩中丞並以賊脅論由是有司得從末減
數十人其民出之賊巢及牽連告捕鍾明童勝等數百人分別悉免坐鄱陽程世

遇睚眦其族人九萬操斧往殺之粹不可得憤而自刎其額創甚夜自經于九萬之門獄成坐九萬刃傷君辨之曰自經非殺也斧劈而額骨亡恙明自割也事遂白廣昌王上遣與陳建松友善同服賈夜遇盜于塗陳被傷死王走伏草中獲免歸語建松子且出其同賈二十金還之陳子疑訟以殺父誣服繫五載卒無案驗君詰其子曰彼殺汝父利得金何不并此二十金乾沒邪陳子語塞其平反不肯妄殺多此類以故江西人哀思之君之先自北平遷大梁五世祖應元前癸丑進士歷官太原知府太原之子文華殿中書舍人諱似梓是為君祖舍人生白石公諱榮舉庚子鄉試是為君考君諱光座字彥升東園其號也登順治己丑進士歷知蘭均二州時詔廷臣舉才勝大郡者大司空劉公昌以君名聞會經畧內院洪公承疇疏請簡用軍前改同知長沙府兼理刑監軍二年以勞績遷衡州知府陞副使督學雲南秩滿進福建興泉道參政最後乃為江西按察使其在均州除山賊王二等校士滇南時方亂定數文教號能知人而興泉二郡距廈門賊巢數百里風帆可食頃至君日夜防禦亡失事平生不喜噉名所歷政績不自紀又罕與人言大抵廉平不擾而在江西為多故余書其大者御史君嘗就首于豫章見君

治爰書亡少輟以節勞諫君曰既食祿敢怠厥職乎長兄光圻戊午舉人官膠州學正其季邑諸生光奎皆相友爱性恬淡寡交游其所歡者相決以誠身歿官橐無長物君生明萬曆庚戌五月十日得年七十一初娶都淑人癸丑進士山西按察使諱任之女事翁以孝聞持身儉待下慈年三十二卒子錦順治己亥進士福建道監察御史君德淑人之賢也義不繼室置側室朱氏王氏朱生子二銘鎮並國學生女一適庚戌進士見任大理寺評事白君夢鼎次子例監生觀王生女四長適漳州知府劉君夢興次子例監生灝餘三女未字孫一人相孫女三人俱幼御史君既立朝傷不得視含殮聞訃徒跣奔江西扶櫬將歸葬於某山之原以都淑人合墓泣請銘於乎已丑同門之友河南得二馬其一為廣東布政使郭君一鶚其一則李君也郭既久下世君又亡子烏能不流涕銘曰

倚與李君世稱長者溫厚寡言如金在冶有耀南宮肇軌州牧公卿大僚交口推轂載司觀察文武具宜好士若渴樹德維滋烽燧游警吏事勞苦用能綏惠海陬江許維德善下不以先人惟勤集事不有其身庶幾廉恕以翼子孫琢石表幽銘以永存

袁勝之進士墓志銘

歲庚申夏五余備官史局袁州進士袁勝之之子一煊來告曰先君未仕而歿葬不備禮以嘗辱游于夫子之門也即不能納石隧中願有銘以聞于世蓋距其卒九年矣余嘗叅守湖西勝之舉進士來從余游者數年今去湖西而歸又十年所勝之久不相聞不知其下世月日子煊之來蓋重悲吾勝之也昔者講學吉州會于青原白鷺之間者俊環集不可勝數吉水龍臚先安福王枚臣兩進士實倡多士于時勝之自袁州熊漁濱自南昌王九山自黃州次第至皆釋褐而未官者相與講誦累日夕不倦觀聽者千餘人勝之歸告其太守重葺昌黎書院請修講會從事尤謹十數年來余既去官兵亂汴擾王子仕旋已龍子困踣以官卒士大夫皆避兵窮山而疇昔衣冠俎豆講習之所蕩為烟燼求寸椽片瓦不可得回計舊游諸子零歇頓盡勝之為名進士家食六七年遂以謁選人客死京邸於乎尤可哀也人患不嚮學既稍有志行卒不得尺寸見諸施行道之所以不行人才之所為殄瘁也君之考諱業泗前明萬厯戊戌進士累官鴻臚寺卿當巡撫中丞某公疏減袁州浮糧時部議攷故額亡徵鴻臚公出所藏舊府志力正之由是知浮額

若干得據以核減袁人至今頌其功不衰勝之嘗乞余為傳又克承其先志修建秀江石梁重葺義倉凡利賴于其鄉者心竭口瘡區算無遺策而不以私干有司其立身也慎以廉其與人也溫以厚嘗與言服官之道勝之瞿然對曰使服官得罪百姓如今日侍臯比何觀其志蓋將以經術飭吏治有學道愛人之風而吞志客死命也君諱繼梓勝之其字生明萬厯庚申五月十一日登本朝順治甲辰進士年五十二以康熙辛亥十月二十日卒先後兩娶皆彭氏生二子一煊貢監生循謹而文稱其家學一焜邑諸生早夭今葬君於挺秀鄉之新安里於乎位不彰其德則必有辭以耀諸幽于是乎銘銘曰

袁之山瘠以巉袁子有之頎然而骨寒袁之水清以駛袁子有之湛乎其不滓豈惟袁產允國之楨一發斯踣胡然而生

前嘉議大夫江西按察使司按察使劉公墓志銘

吾郡先達名御史推工峰劉公累官江西按察使順治八年正月十二日考終葬邑之千堆山郡人賢而思之請祀于鄉既十五年曾孫舉人楷來請曰先曾大父官侍御歷三朝再起再屏終見疏外仕不究其志雖名存國史事列奏牘懼大不

顯于天下後世願不靳一言銘其墓余生同郡相去不百里聞諸父老具言其行事公諱有源字仲開別號崐海南陵人也邑西有工山最高重公者以其地稱工峰先生積學有文舉萬厯三十五年丁未進士魁其經知浙江西安縣縣故孔道先是以供億責農民力困則死徙公預給官費使治厨傳不匱三月一會計官人馬戶不得為奸利其民徭計戶等役貧者不能支公核田壤多寡上下為平準民大悅服又出私錢繕雙溪舟梁在縣五年以最聞四十一年入覲吏部題留考選諸臣皆候命京師公獨念兩尊人年八十馳歸為壽明年詣闕考授貴州道試監察御史未拜命聞父病復請急歸歸而連居父母憂四十六年起補湖廣道試御史時神宗末年倦勤凡行取改授科道者至是皆候考留滯考定入奏又留中久不下公由除服授官而同時徵入者數十人坐待六七年不得命甚且枚卜入閣及舉經畧邊事者皆逾月不報國事日以壅廢公上疏急諫以為羽書疊告朝宇空虛保邦制亂事莫亟于用人今不朝上夕下而若用若置中外皇皇莫知廟算夫重其官而用人則枚卜考選經畧是支傾之木救焚之水也重其人而補官則起廢徵賢是養人之菽粟衛生之藥石也今國家非乏人啟事日滿公車若復印刻

不予石轉為難臣恐天下事不待智者而知所終也書入不省邊事日益壞請兵請餉皆莫應公又有措置軍餉一疏言極危切皆可見諸施行又不報時御史既多缺官公一人兼充巡城十庫監局等差多著勞績而輦下豪猾亡命醵金植黨動至數百人謂之把棍橫恣不道莫能禽制公巡東城首治其豪賈永亨等中貴要人爭為解不聽卒請收捕籍其金以聞當是時人皆目屬以為真御史然不悅者淳衆泰昌元年巡按廣西懲貪雪枉撫輯諸土司事未竣例轉四川參議公遂移疾不赴天啟五年薦起浙江參議備兵台紹巡撫大吏賢之疏請加銜久任會部推四川副使俄召還湖廣道御史以外推而內召人皆以異數為公賀公喟嘆曰時事棘矣吾能覲顏事中貴人哉留數月方行中道抗疏以病辭無一牘抵朝貴坐是忤旨免官閒住蓋是時逆璫魏忠賢專政煽禍朝政如沸羹士大夫被啖以官者不染熏灼則誅殛竄逐禍且不可救而公以閒住潔身事外無它患崇禎改元奄黨既誅召起廢籍諸賢復補公陝西道御史條上兵餉事至再會持議不阿與用事者齟齬再出為山東參政備兵永平未任又改井陘道時畿輔戒嚴訓練民兵三千以固邊圉三年推陞江西按察使公年已六十知終下見用矣拂衣

不待報即行巡按御史憾之外計疏末以老疾致仕公為人廉平內剛外和奉職循謹不務標榜在朝與賢士大夫交而不立黨名嘗慨然曰吾知朝廷而已既出在外又疎簡無所問遺自以待從舊臣不與人俯仰坐是孤立少援見擠于朝如此其于政事知大體巡視十庫時察出解官庫吏關通作偽及庫物朽蠹相仍者建議改折充餉歲可得餉數十萬及巡按廣西壤瘠年饑疏請減免違餉不遺餘力所至民德之而西安被澤久民為立祠初赴官西安時請命于父推已田數十畝分讓諸兄弟曰吾既有薄祿矣既歸老則敦睦宗黨築石堰請除賦役美例攬石作記為德于鄉邦者多不勝書少時為諸生族兄某亡賴以睚眦辱公于市後某坐重法繫獄公貴而多方脫之其它推賢排難不令人知人亦不得而盡知也公生前明隆慶戊辰六月享年八十四得微疾揮手却醫藥五日而卒其先河南羅山人在宋有提舉諱祥者扈蹕南渡徙南陵祥四傳而為明初太醫院判輔輔五傳生貢士邦恩恩生公考諱維和耆碩有隱德今祖考並贈嘉議大夫公娶徐氏累封淑人先公六年卒副江氏譚氏子蘭生篤生並例貢生篤材發宣並邑諸生女二人長適儒士葉同春早寡以節終次適繁昌中書舍人衛君循封孺人孫

男芝瑞台瑞京瑞錫貴繩武文瑞景瑞州瑞用瑞鯉瑞祿瑞凡十一人多列庠序以文學稱女孫十人曾孫男十五人曾孫女八人先是曾大父處士柯喜為詩自號浣溪釣隱公亦多詠歌不事雕飾所著有西臺疏草涉園詩集若干卷舉人楷台瑞之子也年少有學行是將世其家閨章嘉公名德著在御史故叙御史事為詳銘曰

直以匡時卒櫻物忌清以潔身仕不淹位中立無倚用鮮求伎寧為威鳳勿為鷃鷲眾醉獨醒蟬蛻肆志羣茅既拔嘅獨中墜永嘯且歌知希我貴有崇者丘有深者隧追銘表德厥聲弗替

封中憲大夫曹公暨王恭人合葬墓志銘

豐潤曹氏有長者曰封公象賢以康熙戊午十一月十七日卒於家逾二年淑配王太恭人卒于辛酉正月二十日其家君廣信太守泣而以書屬銘予謂太守君哀無盡若兩尊人齊年偕老並受封享祿養於乎亦罕矣公諱繼祖象賢其字先世出宋武穆公後累遷至豐潤自明永樂間伯亮公始亮三傳始以仕顯不絕大父諱登瀛贈通議大夫考諱士直舉明經歷知長江安丘二縣以仲子繼叅貴封

中憲大夫繼叅官袁州知府公其長也數歲喪母有至性見母氏簪珥杯棬輒兄弟相持泣父中憲公憐之終不忍繼室少補諸生有大志軀體岸偉叱咤逼人雅善騎射嘗思豎尺寸為豪舉始從中憲知長汀象洞寇蠹起數千人將逼城下衆洶洶公簡壯士登陴固守寇不敢犯其再從令安丘也會登州兵變臺檄縣轉餉時盜賊塞路前運者多被掠公率騎丁前驅皆薊北健兒途遇十餘騎馳突知其暴客也設弓注矢待之適道旁一雁起應弦而落羣盜相顧咋舌去安丘公歎曰使我兒得將兵數萬于封侯何有公既以勇畧聞臨洮總兵曹變蛟于族次為從叔父請與俱數著奇績以國變不究用公遂老田間士固有幸不幸哉亡何冢君登第入翰林公封矣出知徽州又遇恩受封公笑曰吾少負氣思以武功顯不成今得為詞臣進秩二千石足矣久之徽州坐事奪級歸公謂國家西南方多故義不當即安趨之出得改知廣信歲餘而公以壽終其始就養於徽也樂其風土留一載歸誠曰吾有以自老母苦念我得黃金萬不若使民無怨太守君泣拜受命由是能為郡即左官以歸郡人擁車枳道奉卮酒張錦幔走送百餘里公之教也其守廣信又戒之如初嗟今之人貨視其子惟筐篚是徵得金多則曰是能養我

以視公奚若耶王恭人孝廉明教女得舅姑歡既生子四人猶強為封公置副室張氏舉三子遇之悉如已出及封公捐館舍哀甚諸生跪進食輒泣曰未亡人復何餘年待長兒歸與訣吾逝從泉下矣已而廣信君柩舍十三日遂瞑封公生明萬厯己亥六月五日太恭人後二年生為萬厯辛丑五月十六日卒年並八十有一子七人鼎望順治己亥進士翰林院庶吉士刑部員外郎出知徽州廣信二府加一級次民望庠生鴻臚寺主簿次斗望拔貢生早卒次人望監生考定州同知並王恭人出次德望庠生偉望令望俱副室張出孫九人鼎望出者廩貢生釗內閣中書舍人鈐監生銘民望出者增監生鱗次錡斗望出者庠生鉦鈐次鈐人望出者鏗女孫十二人皆適名族曾孫男女各四人某年月日將合葬於某山之原謹書其大者于石銘曰

天與善人惟德是蕃武穆之裔曰仁義存懷寶弗耀冒沃其根令妻壽母施及子孫既貴且賢於昭有聞駢肩耄耄純嘏斯敦用永幽懿塋石墓門

明經梁君墓志銘

君諱天爵字世臣別號水鳬江西泰和人也泰和之世族梁氏最舊其家柳溪里